



SAOPĆENJE ZA JAVNOST

Podmićivanje na izborima Istraga proširena na 13 osoba

(Brčko, 14.11.2024. godine)

Intenzivno istražujući izborne nepravilnosti na nedavno održanim lokalnim izborima Tužilaštvo Brčko distrikta BiH proširilo je istragu na ukupno 13 osoba koje sumnjiči za udruživanje radi činjenja krivičnog djela povrede slobode odlučivanja birača. Krajem prošle sedmice, na prijedlog ovog tužilaštva, Osnovni sud produžio je pritvor provosumnjičenom organizatoru A. D. (59)*, te pripadnicima ove grupe A. H. (52)* i A. R. (46)*, zbog sumnje da su se udružili kako bi podmićivanjem uticali na birače da na izborima glasaju za prvoosumnjičenog. Pritvor im je produžen za dva mjeseca usljed opasnosti da bi uticajem na svjedoke i saučesnike mogli ometati krivični postupak.

Na sam dan izbora, Tužilaštvo i Policija Brčko distrikta BiH započeli su istragu izbornih zloupotreba u okviru koje su izvršena hapšenja i pretresi većeg broja osoba, prostorija i vozila koje koriste. Istraga je otvorena zbog sumnje da se više njih, tokom septembra i oktobra 2024. godine, udružilo kako bi podmićivanjem birača osigurali glasove za prvoosumnjičenog A. D, kao kandidata za zastupnika u Skupštini Brčko distrikta BiH. Tužilaštvo i Policija svakodnevno su otkrivali nove detalje i osobe za koje se sumnja da su kao saizvršioци učestvovali u izvršenju ovog krivičnog djela. Istraga je do danas više puta proširena, a nakon novih hapšenja ove sedmice ona obuhvata ukupno trinaestoro osumnjičenih. Kako se navodi u naredbi o novom proširenju istrage od 12. novembra, nakon što je pripremio određen iznos novčanih sredstava, u namjeri na izborima podmićivanjem birača osigura određen broj glasova i sebi olakša izbor za zastupnika, A. D. je organizirao grupu kojoj je pristupilo 12 osoba, a koje su pristale da po njegovim uputama vrše podmićivanje birača. Svi oni osumnjičeni su za krivično djelo Udruživanje radi počinjenja krivičnih djela u sticaju sa krivičnim djelom Povreda slobode odlučivanja birača

Podsjetimo, troje pripadnika ove grupe lišeno je slobode na dan izbora, nakon čega je prema A. R. određen jednomjesečni pritvor, koji joj je prošle sedmice produžen za dva mjeseca. Dana 15. oktobra izvedena je operativna akcija *Kupac* u kojoj su uhapšeni organizator A. D. i pripadnici grupe S. T. i A. H, a koji su po prijedlogu Tužilaštva takođe pritvoreni na jedan mjesec. Budući da je istraga konstantno otkrivala učešće još osumnjičenih, Tužilaštvo je kontinuirano proširivalo istragu predloživši da se, radi njenog uspješnog okončanja, za dva mjeseca produži zadržavanje u pritvoru i osumnjičenih A. D. i A. H. Pošto je sud usvojio ovaj prijedlog, Tužilaštvo i Policija nastavili su intenzivno zajedničko djelovanje i skoro svakodnevna hapšenja osumnjičenih pripadnika grupe. Oni su svi ispitani i prema njima se provode daljnje mjere u pravcu utvrđivanja krivične odgovornosti zbog povrede izbornih prava i sloboda građana.

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.